

PERTANYAAN DEWAN RAKYAT

PERTANYAAN : **BERTULIS**
DARIPADA : **DATO' HAJI MAHFUZ BIN OMAR**
KAWASAN : **POKOK SENA**

SOALAN:

YB. DATO' HAJI MAHFUZ BIN OMAR [POKOK SENA] minta **MENTERI KERJA RAYA** menyatakan kenapa para kontraktor perlu berdaftar dan mendapat sijil daripada dua agensi yang berbeza dengan fungsi yang sama iaitu CIDB dan PKK, sedangkan arahan awal supaya kontraktor berdaftar dengan CIDB ialah dengan tujuan supaya tidak lagi berdaftar dengan PKK. Bukankah keperluan ini hanya akan menyusahkan para kontraktor dan meningkatkan kos perniagaan mereka.

JAWAPAN:

Tuan Yang Di-Pertua;

Untuk makluman Ahli Yang Berhormat, berkuat kuasa pada 15 Oktober 2012, Kerajaan telah melaksanakan Sistem Satu Pendaftaran Kontraktor (SSPK).

Berikut itu semua lesen kontraktor yang dikeluarkan oleh Pusat Khidmat Kontraktor (PKK) – kini dikenali sebagai Bahagian Pembangunan Kontraktor dan Usahawan (BPKU), Kementerian Kerja Raya - telah dibatalkan dan diganti dengan Sijil Perolehan Kerja Kerajaan (SPKK) yang dikeluarkan oleh Lembaga Pembangunan Industri Pembinaan Malaysia (CIDB). Walaupun begitu, Sijil Taraf Bumiputera bagi mengenal pasti status bumiputera masih kekal di bawah kawalan dan seliaan PKK.

Untuk makluman Ahli Yang Berhormat, Sistem Satu Pendaftaran Kontraktor atau SSPK ini ialah merupakan inisiatif Kerajaan untuk mengasingkan prosedur pendaftaran kontraktor dan pengiktirafan Taraf Bumiputera kepada agensi berasingan. Melalui SSPK ini CIDB akan bertanggungjawab ke atas perkara-perkara berkaitan pendaftaran kontraktor, manakala PKK pula bertanggungjawab kepada pengiktirafan Taraf Bumiputera.

Sehubungan itu kontraktor yang telah berdaftar dengan CIDB dalam Perakuan Pendaftaran Kontraktor (PPK) layak untuk menyertai projek-projek sektor swasta manakala untuk projek-projek Kerajaan pula, mereka juga perlu berdaftar dengan CIDB dalam Sijil Perolehan

Kerja Kerajaan (SSPK). Kontraktor hanya perlu ke PKK bagi permohonan pengiktirafan Taraf Bumiputera jika mereka berminat untuk menyertai projek-projek Kerajaan yang bertaraf Bumiputera sahaja. Kos pendaftaran juga hanya dikenakan semasa membuat pendaftaran dengan CIDB manakala tiada sebarang kos dikenakan bagi mendapatkan pengiktirafan Taraf Bumiputera dengan PKK.

Untuk makluman Ahli Yang Berhormat, pelaksanaan SSPK yang berkonsepkan “Satu Pendaftaran, Satu Klasifikasi, Satu Bayaran” ini telah dapat mengurangkan kos perniagaan, mengelakkan pertindihan fungsi dan tanggungjawab, dan dapat mengurangkan karenah birokrasi pendaftaran kontraktor. Di samping itu SSPK ini juga telah dapat mewujudkan keseragaman polisi pembangunan, akreditasi dan pendaftaran kontraktor serta pemusatan maklumat kontraktor yang komprehensif.

Sekian. Terima kasih.